

Prontu, Firmi, Korta

Uza Tizora ku Mon Pikinóti

Prende uza tizora pode ser asutador pa pais y kuidadoris, má divirtidu pa mininus. Kriansas debe konstrui y pratika ses abilidadadi ku tizora au longu di ténpa.

Antis di uza tizora, kriansas ta meste dizenvolve dédus fórti y bon kordenason di mon-odju. Apoia abilidadadis pré-tizora y poi bu fidju ta: Ratxa papel. Brinka ku plastisina. Pinta ku kotoneti. Panha objétus ku pinsa. Pratika múzikas di brinka ku dédu, sima “The Itsy-Bitsy Spider.”

Dikas di Feraméntas

Tizora é un feraménta, y nau un brinkédu. Kriansas ka debe nunka anda nen kóre ku tizora na mon. Nhos konversa sobri kuzê ki el debe korta (papel, plastisina), y kuzê ki el ka debe korta (ropa, kabelu). Kumesa ku tizora di plástiku pa korta plastisina. Dipos, sprimenta tizora pa papel (sô óra ki bo y bu fidju sta prontu).



Kel Báziku

Djuda bu fidju prende uza es feraménta li. Mostra-l módi ki el ta:

- Mete dédu polegar na kel arku diriba.
- Mete dédu indikador y dédu di meu na kel arku más kunpridu dibaxu.
- Diskansa kes otu dédu na parti di fóra di kel arku dibaxu pa susti tizora.
- Uza kel otu mon pa pega kel kuza ki el sta korta.
- Abri y fitxa tizora pa korta.

Kuzas pa Sprimenta ku Kriansas entri 2 y 3 Anu

- **Padás di plastisina.** Bu fidju pode pratika abilidadis di korta na inísiu ku tizora di plastisina. Rola un poku di plastisina en forma di un “kóbra” kunpridu. El pode uza tizora pa korta kel padás kunpridu en padasinhus.
- **Rikortis di plastisina.** Kalka plastisina ti ki fika sima un pankéka. Insertiva bu fidju pa uza tizora di plastisina pa faze rikortis na bórda di kel pankéka en direson a meu. El pode tenta korta pankéka más grós y pankéka más finu.
- **Rikortis di papel.** Óra ki bu fidju sta prontu, intruduzi tizora di papel. Korta un sírkulu nun papel grós. Mostra bu fidju módi ki el ta pega kel sírkulu y uza tizora di papel pa faze rikortis na bórda di papel en direson a meu. El pode korta a vólta di bórda pa kria un franja (sima juba di lion ô pétala di flor). Da-l lápís di sera pa disenha na kel forma final.



Más! →

Kuzas pa Sprimenta ku Kriansas entri 3 y 5 Anu

- **Sigi linha.** Nun folha di papel, dizenha un linha rétu, largu di riba pa baxu. Mostra bu fidju módi ki el ta korta kel linha. El pode tenta korta un linha más finu. Un linha kurvadu. Un linha en zig-zagi. Ô un linha ki el mê ki dizenha.
- **Fórmas báziku.** Dizenha três fórmá báziku na papel (kuadradu, sírkulu y triángulu). Pidi bu fidju pa kortá-s. Ka bu priokupa si kes fórmá ka sai kortadu pirfeitu. El pode uza kóla ô fita-kóla pa faze un kolaji ku kes rikorti.
- **Rikortis di adizivus.** Dexa bu fidju poi alguns adizivu di formatu redondu nun padás di papel. Insertiva-l pa el korta entri kes adizivu ti ki es fika siparadu di kunpanheru. Dipos, el pode uza kóla ô fita-kóla pa adisiona kes adizivu di formatu redondu na se kolaji.



Atenson: Kes material ki sta sublinhadu bu ta atxá-s na bu kit. Kes material en *itáliku* bu pode tenê-s na kaza ô bu pode uza un kuza semelhanti.

Kuzas pa Fla

**“Ka meste présa.”
“Tizora é konplikadu.”**

Korta ku tizora ta iziji práktika. É trabadju difísil pa un kriansa, purisu seja puzitivu y inkorajador.

“Kuzê ki bu kre korta?”

Da bu fidju alguns opson di kuzas pa korta. Da-l alguns folhetu bédju ô papel risikladu y dexa bu fidju kortá-s sima el kre.

**“Uau! Dja N odja
ma bu sta sforsa pa
pratika korta.”**

Aplaudi sforsu, nau prudutu. Mésmu ki fórmas ka sai mutu dretu, bu fidju sforsa txeu pa fazê-s.